

# La nova politica agrara – e per l'armada

Pcd: Vehement cunter abolir l'obligaziun da far servetsch militar

■ (anr/gc) Delegads e delegadas da la Partida cristiandemocratica (pcd) grischuna èn sa radunads glindesdi en l'aula dal Center da furmaziun e cussegliaziun agricola al Plantahof/Landquart. Il dretg lieu per sa laschar orientar davart la nova politica agrara da la Svizra ils proxims onns. Plinavant è la refusa da l'iniziativa dalla Gsoa, che vul abolir l'obligatori da stuair far servetsch militar e qua tras l'armada senza, stada zunt massiva. Il parsura da la pcd, cuss. dals chantuns *Stefan Engler*, ha pudì beneventar – e quai fa el adina en tuts trais linguatgs chantunals – ultra dals delegads era plirs magistrats cristiandemocrats en u ord uffizi. Da menziunar spezialmain è bain la preschientscha dad a. cuss. naz. e gov. *Ettore Tenchio*, sco doyen, che cumplenescha en curt ils 98. Cordial è medemamain stà il bainvegni da deputà *Livio Zanetti*, president da la pcd da Landquart – che saja la pli gronda gruppaziun politica locala.

Cun in memento sa regordan ins d'antieriurs deputads defuncts: Pius Condrau, Mustér, Walter Spinas, Tinizong e Gieri Capaul, Lumbrein.

## La nova politica agrara e las muntognas

Prominent referent surlonder è stà il nov president da l'Uniun purila svizra, cuss. naz. *Markus Ritter* (pcd), che n'ha betg gì lunsch da vegnir dad Altstätten (SG) a Landquart. El, ch'enconuscha era bain il Grischun, dilucidescha propostas e cun-



**Stefan Engler, president da la pcd, brigadier Lucas Caduff e cuss. naz. Markus Ritter, parsura da l'Uniun purila svizra (da san.).** FOTO G. CAPAUL

tegn da l'agenda per la politica agrara 2014–2017 ch'ins ha preparà e vegn bainprest a preschentar. Finamira saja da pudair francar la suveranità dal nutriment en il rom da las finanzas a disposiziun. Dals instruments ha el allegà oravant tut la ferma promoziun da la biodiversità. Per tala dettia i considerablmain era dapli sustegn finanziar. Qua tras possian vegnir cultivadas er ecologicamain pli bieras surfatschas pendentas en muntogna. Dapli sustegn datti era per alps ed alpegiar insumma.

Sut l'egida da *Curdin Foppa*, manader dal servetsch da cussegliaziun purila al Plantahof, han il pur e deputà *Daniel Albertin*, Mon, e la pura diplomada e deputada *Margrit Darms-Landolt*, Schnaus, illustrà or da vista da lur menaschis – tar in vegn tegni vatgas-mamma e tar l'auter produci – divers aspects, fatgs, spetgas ed experientschas. Cuss. naz. Markus Ritter ha dentant sincerà ch'ìls territoris da muntogna profitechian fitg da la nova politica agrara en il

rom da pajaments directs. En tut stettian 2,7 milliardas francs a disposiziun ad onn ed il retgav muntia dentant a trais giadas dapli. In fatg deplorabel saja che minga di svaneschian trais bains purils, fertant ch'ìls restants creschian. Bler memia gronda saja la sperdita da terren cultivà tras bajegiar. Cun ina iniziativa sin plaun federal vulessan ins dentant reducir quella surfatscha. Las finamiras da la politica agrara sajan: Produzziun, ecologia e la gulivaziun sociala.

## Segirezza, stabilitad e bainstanza tras l'armada

Brigadier *Lucas Caduff*, da Schlans cun domicil ad Eigias/Landquart e responsabel per la scolaziun militar a Colombier, è il pli aut uffizier rumantsch. El s'audia tar ils paucs Grischuns en il rang general. Il brigadier sursilvan preschenta – dal reminent en tuts trais linguatgs grischuns – la gronda muntada da l'armada. Quella dettia segirezza, procura per stabilitad, gidia a garantir e mantegnair la bainstanza en noss pajais. L'iniziativa, che vul abolir l'obligaziun da far servetsch militar, na veglia betg acceptar ch'ì dettia anc oz ristgs militarics, crisas, conflicts e catastrofes che motiveschian l'existenza da l'armada. L'incarica primara e da l'armada saja numnadamain da proteger, gidar e defender. Gist pervia da la neutralità saja quella indispensabla.

Ina illusiun totala saja i da crair ch'ina armada da milissa possia vegnir remplazzada tras ina tala da voluntaris. Uschia avessian ins segir memia pouca glieud per ademplir l'incarica. (Tar il servetsch militaric voluntari feminin s'annunzian en Svizra strusch 150 dunnas ad onn.) E tar tut auter fissia quella era bler pli chara.

Facit: L'iniziativa per abolir l'obligaziun da prestar servetsch militar chaschunia malsegirezza ed indebleschia la Svizra. Perquai saja quella da refusar. Uschia decida era la pcd cleramain na a quella iniziativa.